

# Asia Timur harus amal sikap tolak ansur: PM

BH- 5/12/2006

## Kekurangan iltizam, kesungguhan faktor hubungan belum memuaskan

Oleh Abdul Halim Yusoff

**K**UALA LUMPUR: Semua negara di rantau ini perlu mengamalkan sikap bertolak ansur dan kesederhanaan dalam hubungan sesama mereka bagi menjamin kejayaan pembentukan komuniti Asia Timur, kata Datuk Seri Abdullah Ahmad Badawi.

Perdana Menteri berkata, ketika ini negara Asia Timur belum memanfaatkan sumber dan peluang yang ada secukupnya untuk memperkukuhkan persekitaran ke arah keamanan, keselamatan serta kemakmuran.

Katanya, kekurangan iltizam dan kesungguhan di kalangan negara serantau untuk mencapai matlamat yang disasarkan menjadi punca wujudnya keadaan yang belum memuaskan

kan dalam hubungan antara negara Asia Timur.

Beliau berkata, sikap negara rantau ini yang masih kurang bersemangat untuk bekerjasama dan saling memahami menjadi punca yang menyukarkan usaha pembentukan Komuniti Asia Timur.

"Hubungan antara negara di rantau ini yang dilakukan dengan bersederhana dan saling menghormati akan menjadi tunjang ke arah pembangunan komuniti Asia Timur," katanya berucap pada pembukaan Kongres Asia Timur Keempat anjuran Institut Kajian Antarabangsa dan Strategik (ISIS) di sini, semalam.

Hadir sama, Pengerusi yang juga Ketua Eksekutif ISIS, Datuk Seri Mohamed Jawhar Hassan.

Perdana Menteri berkata, proses Asean+3 yang membabitkan Asean,

**“**Hubungan antara negara di rantau ini yang dilakukan dengan bersederhana dan saling menghormati akan menjadi tunjang ke arah pembangunan komuniti Asia Timur”

**Abdullah Ahmad Badawi**  
Perdana Menteri

China, Korea Selatan dan Jepun, mesti menjadi penggerak pembentukan komuniti Asia Timur, sementara proses Sidang Kemuncak Asia Timur (EAS) sebagai dialog strategik.

"Hingga kini, wujud perbincangan tidak produktif dan tak berkesudahan mengenai proses yang perlu diutamakan atau siapa yang perlu dimasukkan," katanya.

Perdana Menteri berkata, negara Asia Timur perlu berusaha memastikan penyusunan semula ekonominya dilakukan secara menyeluruh dan mendalam bagi menjamin keberkesanan berbuat demikian.

Abdullah yang juga Menteri Kewangan berkata, jika usaha ke arah penyusunan semula ekonomi tidak diperteguhkan, rantau ini akan berdepan bahaya momentum yang sedang dibina akan terjejas.